




جَيْلَانْجَالْجَوَالْ أَكَامَهَلْ إِسْلَامْ نَجَارْ قِدْحَارَاهَمَنَا

JABATAN HAL EHWAL AGAMA ISLAM NEGERI KEDAH

PANDUAN ASAS MELAKSANAKAN IBADAH KORBAN



I. Pengertian Ibadah Korban

Ibadah korban merupakan salah satu ibadah yang agung sepetimana yang dilaksanakan oleh Nabi Allah Ibrahim A.S yang bertujuan untuk mendekatkan diri kepada Allah SWT. Ianya dilaksanakan dengan cara menyembelih binatang korban seperti unta, lembu, kambing dan biri-biri. Menyembelih korban adalah ibadah yang disyariatkan berdasarkan kepada al-Quran, al-Sunnah dan al-Ijma'. Pensyariatan ini telah berlaku sejak tahun ke-2 Hijriyah di mana turut disyariatkan solat dua hari raya (Aidil Fitri dan Aidil Adha) pada tahun tersebut.

2. Hukum Dan Hikmah Melaksanakan Korban

Hukum melaksanakan ibadah korban bagi Mazhab Syafie adalah Sunat Muakkad (sunat yang amat dititik beratkan). Ini adalah kerana ia merupakan syiar Islam yang wajib keatas muslim yang berkemampuan demi menjaga terhadap syiar tersebut.

Melaksanakan ibadah korban mengandungi hikmah yang besar antaranya:

- a. Ibadah korban disyariatkan sebagai tanda bersyukur kepada Allah SWT atas segala nikmat-Nya.
- b. Ibadah korban akan menjadikan kifarat bagi pelakunya disebabkan kesilapan-kesilapan yang telah dilakukan, ataupun dengan sebab kecuaianya dalam menunaikan kewajipan.
- c. Ibadah korban juga salah satu wasilah menolong orang fakir dan orang yang berhajat serta menggembirakan mereka, anak isteri dan keluarga pada hari raya.
- d. Mengeratkan hubungan silaturrahim antara anggota masyarakat Islam dan mananamkan semangat hidup berjemaah serta berkasih sayang.

3. Individu Yang Dituntut Melakukan Korban

Syarat asas untuk melaksanakan ibadah korban ialah Islam, baligh dan berakal. Namun amat dituntut bagi yang berkemampuan melaksanakannya, iaitu mereka yang mempunyai wang untuk berbelanja mendapatkan ternakan korban, yang lebih daripada keperluannya dan keperluan mereka yang berada di bawah tanggungannya untuk Hari Raya dan Hari-hari Tasyrik.



4. Syarat Sah, Tempoh Dan Masa Ibadah Korban

a) SYARAT SAH KORBAN :

- i Niat untuk taqarrub diri kepada Allah SWT. Waktu niat korban adalah semasa menyembelih atau semasa membeli ternakan korban.
- ii Memilih ternakan korban yang boleh dikongsi bahagian seperti unta, lembu dan kerbau jika ingin berkongsi tujuh orang. Manakala kambing atau biri-biri dikhlasukan untuk seorang yang mewakili satu bahagian.

b) TEMPOH DAN MASA IBADAH KORBAN SEPERTI BERIKUT :

- i Penyembelihan hendaklah dilakukan pada Hari Nahar (10 Zulhijjah) dan Hari Tasyrik (11 hingga 13 Zulhijjah) meliputi malam ke-11, 12 dan 13. Korban tidak sah dilakukan pada malam sebelum Hari Raya (10 Zulhijjah). Begitu juga tidak sah jika dilakukan pada malam 14 Zulhijjah.
- ii Penyembelihan dilakukan apabila berlalu masa dua rakaat solat Hari Raya Aidil Adha berserta khutbah. Contohnya masa yang ditetapkan untuk Hari Raya Aidil Adha pada jam 8.30 pagi dan selesai pada jam 9.30 pagi. Maka waktu berkurban bermula selepas jam 9.30 pagi.
- iii Waktu penyembelihan korban berterusan siang dan malam naunun makruh hukumnya jika dilakukan pada waktu malam selingga Hari Tasyrik yang terakhir iaitu 13 Zulhijjah sebelum terbenamnya matahari. Bagi penyembelihan korban yang dilakukan sebelum terbit fajar, tidak sah hukumnya.
- iv Sekiranya penyembelihan korban dilakukan selepas terbit matahari dan sebelum waktu solat sunat Hari Raya Aidil Adha tidak mendapat pahala sunat dan tidak dikira sebagai korban.

5. Lafaz Dan Wakalah Niat Korban

Lafaz dan wakalah niat korban boleh dibahagikan kepada beberapa situasi yang berikut :

a) PIHAK WAKIL MELANTIK WAKIL LAIN (TAWKIL) MELAKSANAKAN KORRBAN

Wakil tidak harus mewakilkan orang lain terhadap apa yang diwakilinya tanpa izin pewakil. Tetapi sekiranya pewakil (orang yang bermuat korban) mengungkap dengan lafaz umum, maka harus bagi wakil untuk mewakilkan kepada orang lain berdasarkan kepada kefahaman umum. Sekiranya pewakil tidak menyebut lafaz yang menunjukkan umum keizinannya untuk bertindak, maka tidak harus bagi wakil mewakilkan (tawkil) kepada orang lain.

b) BEBERAPA PERKARA YANG PERLU DIKETAHUI SEBELUM MEWAULKILKAN URUSAN KORBAN

- i Hendaklah mengetahui kadar harga bagi satu bahagian korban yang dikenakan.
- ii Hendaklah mengetahui kadar upah yang diambil oleh pihak yang melakukan korban.
- iii Hendaklah mengagihkan daging korban mengikut hukum syarak.
- iv Hendaklah mengetahui orang yang akan menjadi wakil untuk menyembelih haiwan korban.

c) BENTUK-BENTUK LAFAZ DAN WAKALAH NIAT KORBAN

i. Jika Ramai Peserta

• Contoh Lafaz Wakalah Dari Peserta Korban.

Adalah saya dengan ini mewakilkannya kepada untuk mengurus dan melaksanakan ibadah korban bagi pihak saya dan isteri saya serta anak-anak saya 1....., 2....., 3....., 4....., 5..... dengan kadar harga RM..... kerana Allah Taala.

• Contoh Lafaz Penerima Wakalah

Saya dengan ini menerima wakalah daripada bagi mengurus dan melaksanakan ibadat korban bagi pihak dirinya dan ahli keluarganya kerana Allah Taala.

ii. Jika Satu Tompok

• Wakalah Dari Peserta Korban

Adalah saya (orang yang berwakil) dengan ini mewakilkannya kepada (orang yang dijadikan wakil), untuk mengurus dan melaksanakan ibadat korban** bagi pihak saya dengan kadar harga RM..... termasuk upah bagi satu tompok kerana Allah Taala.

• Penerima Wakalah

Saya dengan ini menerima wakalah daripada setompok dengan harga yang tersebut termasuk upah bagi mengurus dan melaksanakan ibadat korban bagi pihak dirinya kerana Allah Taala.

PERINGATAN. ** Jika korban nazar perlu disebutkan "korban wajib"

6. Syarat Sah Sembelihan Korban

- a) Syarat sah sembelihan adalah dengan memutuskan:
 - i. dua urat pembuluh darah, iaitu karotid dan jugular (wadajain);
 - ii. urat mari' (saluran makanan); dan
 - iii. halqum (saluran pernafasan).
- b) Disyaratkan alat menyembelih hendaklah tajam, bukan menggunakan alat yang tumpul, tulang dan gigi haiwan.

7. Perkara Sunat Dan Makruh Ketika Korban

- a) Antara perkara sunat ketika melakukan korban adalah seperti yang berikut:
 - i) Menambat ternakan korban menjelang Hari Nahar.
 - ii) Memberi makanan kepada haiwan korban sebelum disembelih.
 - iii) Memastikan haiwan tersebut tidak makan makanan yang syubhah seperti makan rumput di kawasan yang bukan milik tuan haiwan korban dan sebagainya.
 - iv) Meletakkan tanda serta menutup tubuh haiwan korban supaya dapat merasakan kepentingan korban.
 - v) Melakukan penyembelihan korban dengan sendiri.
 - vi) Membaca Bismillah.
 - vii) Berselawat ke atas Nabi SAW.
 - viii) Penyembelih dan haiwan mengadap ke arah qiblat.
 - ix) Memilih haiwan ternakan yang paling baik.
 - x) Menunggu haiwan yang disembelih itu sehingga sejuk dan semua anggotanya tidak bergerak lagi atau benar-benar mati dan baharulah dilapah.
 - xi) Orang yang melakukan korban disunatkan tidak bercukur dan tidak memotong kukunya setelah tiba bulan Zulhijjah sehingga dia telah selesai berkurban.

b) Manakala perkara yang makruh ketika berkorban adalah seperti yang berikut:

- i) Melakukan korban ke atas haiwan yang carik telinganya atau terpotong sedikit di belakang telinganya.
- ii) Memotong bulu haiwan yang hendak dikorbankan bagi tujuan kegunaan sendiri jika boleh memudaratkannya.
- iii) Melakukan korban ke atas haiwan yang pecah atau patah tanduknya, atau tiada bertanduk.
- iv) Memerah susu haiwan yang hendak dijadikan korban dan meminumnya kecuali disedekahkan susu tersebut.
- v) Memotong kuku dan bercukur bagi orang yang berniat korban.
- vi) Melakukan sembelihan korban pada waktu malam.

8. Kaedah Agihan Daging Korban

Sebelum melaksanakan pengagihan daging korban, hendaklah mengasingkan antara daging bahagian korban wajib daripada daging bahagian korban sunat sebelum diagihkan kepada penerima. Hal ini jika perkongsian tujuh bahagian ini berlaku antara mereka yang berniat korban wajib dengan mereka yang berniat korban sunat, atau ada bahagian yang dimiatkan untuk aqiqah. Langkah ini amat penting kerana daging korban wajib, wajib diagihkan kepada yang berhak kesemuanya, begitu juga dengan bahagian aqiqah yang ada cara pengagihannya yang sedikit berbeza dengan pengagihan korban sunat.

Beberapa urusan lain yang berkaitan dengannya hendaklah diputuskan melalui jawatankuasa yang dibentuk. Antaranya :

- a) Memastikan daging korban cukup untuk diagihkan kepada pihak-pihak yang telah disenaraikan;
- b) Menyediakan senarai penerima daging korban mengikut keutamaan;
- c) Mengutamakan golongan fakir dan miskin yang telah dikenal pasti status mereka;
- d) Mengagihkan daging korban kepada mereka yang tinggal di kawasan terpencil;
- e) Menyediakan kontena peti sejuk (jika perlu) untuk menempatkan daging korban sebelum ia diagih ke kawasan pedalaman; dan
- f) Mengagihkan daging korban kepada golongan yang berada sekiranya terdapat lebihan daging korban tersebut.

9. Pelbagai Isu Berkaitan Hukum Korban

a) APAKAH HUKUM BERKONGSI KORBAN DAN AQIQAH PADA SEMBELIHAN YANG SAMA?

Boleh untuk disekalikan niat korban dan aqiqah pada 7 bahagian bagi lembu dan juga unta.

Sekiranya seseorang itu mampu, maka yang terbaiknya adalah dengan mengasingkan haiwan setiap satu daripada ibadah tersebut tanpa berlakunya perkongsian (korban dan aqiqah disekalikan)

b) HUKUM MELAKUKAN KORBAN BUAT SI MATI

Tidak boleh dilaksanakan korban kepada si mati mengikut pendapat kebanyakan ulama' Syafi'eyyah yang menetapkan mesti adanya wasiat dari si mati untuk melakukan korban buat dirinya

c) HUKUM MEMBERIKAN DAGING KORBAN SEBAGAI UPAH PENYEMBELIH

Tidak dibolehkan untuk memberikan upah berupa bahagian korban kepada tukang sembelih.

Sekiranya hendak diberikan upah, makan dibolehkan diberikan kepada penyembelih menggunakan harta dari empunya korban atau sesuatu organisasi dan bukannya dari bahagian korban.

d) HUKUM DARI SUMBANGAN AGENSI ATAU PIHAK KERAJAAN

Tidak boleh dijadikan korban kerana ianya atas nama satu jabatan secara umum, tidak khusus. Terjadinya hukum korban hendaklah lembu itu diletakkan atas nama individu secara paling maksima 7 orang individu menepati 7 tompok / bahagian bagi seekor lembu korban.

Wakil Kerajaan Negeri yang menyerahkan lembu itu kepada seorang individu dari jabatan yang menerima (sama ada individu tersebut Ketua Jabatan atau mana-mana kakitangan jabatan itu) boleh dijadikan binatang korban.

e) HUKUM MENYIMPAN DAGING KORBAN

Dbolehkan untuk menyimpan daging korban melebihi 3 hari mengikut pendapat jumhur ulama'.

f) HUKUM BAYARAN WANG KORBAN MELALUI ONLINE BANKING DAN WAKALAH MELALUI PERANTARAAN WHATSSAP, FACEBOOK, EMAIL, SMS DAN LAIN-LAIN

Sah dan dibolehkan mewakilkan dalam pembelian binatang korban dan juga penyembelihnya dengan serahan wang boleh dilakukan dengan membuat bayaran atau memindahkan wang melalui cara perkhidmatan perbankan online, wakalah boleh disahkan melalui email, sms, whatsapps, facebook dan lain-lain bentuk komunikasi. Sebaik baiknya dinyatakan aqad wakalah secara bertulis dengan menyatakan dengan jelas harga binatang korban, berapa upah dan skop kerja yang dilakukan dan dipersetujui atau ditandatangani oleh kedua-dua pihak.

g) HUKUM MELIHAT PENYEMBELIHAN KORBAN

Walaupun telah menyerahkan perlaksanaan ibadah korban kepada orang lain, namun disunnatkan kepada al-muwakkil (orang yang menyerah) untuk turut hadir menyaksikan penyembelihan korbannya dilakukan. Ini sebagaimana sabda Nabi SAW kepada Fatimah RA; “Pergilah kepada binatang korban kamu dan saksikanlah dia kerana sesungguhnya dengan titisan pertama darah yang jatuh darinya akan menyebabkan diampunkan untukmu segala dosa kamu yang lalu” (Mustadrak al-Hakim; 7525, dari Abu Sa’id al-Khudri RA).

Sumber Rujukan

- Garis Panduan Pelaksanaan Ibadah Qurban Jabatan Kemajuan Islam Malaysia, Bilangan 2, 2013
- Al-Bayan Siri 2 – Pejabat Menteri Di Jabatan Perdana Menteri (Hal Ehwal Agama)
- Risalah Aidil Adha, Pelaksanaan Korban & Hikmahnya Edisi 1436/2015 - Jabatan Mufti Negeri Kedah Darul Aman
- Irsyad Al-Fatwa Pejabat Mufti Wilayah Persekutuan



Diterbitkan Oleh:

BAHAGIAN DAKWAH

JABATAN HAL EHWAL AGAMA ISLAM NEGERI KEDAH

Bangunan Wan Mat Saman, Jalan Raja, 05676 Alor Setar, Kedah Darul Aman.

Tel: 04-774 5400 / 04-733 3288 Faks: 04-733 8333

email:jhealkdakwah@kedah.gov.my / Fb:Dakwah JAIK